

# Min Áigi

**Sadjásaš  
oaivedoaimmaheaddji:**  
Svein Nordsletta

Min Áigi bargá «leage várru-  
gasplákáhta» buori preassavieru  
njuolggadusaid mielde. Son guhte  
oaivvilda iežas vigiheamit gillát  
unohis áviisabeaggima, ávžžuhuvvo  
váldit oktavuoda doaimmahusain.  
Pressens Faglige Utvalg (PFU) lea  
váidalusorgána man Norsk  
Presseforbund lea nammadan.  
Orgána, mas leat lahtut  
preassaorganisašuvnnain ja  
álbmogis, giedahallá váidalusaid  
preassa vuostá  
preassaetiikkalaš áššiin.

**PFU**

Čujuhus: Prinsensgt. 1  
Postboks 46, sentrum, 0101 Oslo,  
Telefuodna: 22 4 50 40. Fákasa: 22 40 50 55

## Guhkes lávki ovddasguvlui

■ Dáid beivviid almmuhuvvui geahččanveršuvdna sáme giela divvunprošeavttas. Prošeakta lea jođus leamašan juo mánga jagi ja dán lea Sámediggi ruhtadan. Oanehaččat mitaluvvon lea ahte lea ráhkaduvvon dihtorprográmma mii galgá leat veahkkeneavvun divodit riektáčállima sáme gielas. Jus mahkaš don čálat boastut muhtin sáni, de váldá prográmma ja merke dán sáni rukses sázuin. Dalle sáhtat deaddilit dán sáni, ja de buktá prográmma evttohusaid. Das manjá de mearridat don ieš válljet go ovttá dain evttohusain vai doalahat go dan maid leat čállán.

■ Dát mearkkaša ahte dus ferte gal leat vuodđooahppu sáme gielas go galggat geavahit dán veahkkeneavvu. Dat mii liikká lea buorre dás, lea ahte don árat sáhtat fuomášit gielalaš boasttuvuođaid dahje njulgestaga čállinmeattáhusaid. Sidjiide geat beaivválaččat barget čálalaš sáme gielain lea dát veahkkeneavvu doaimumis duođaid áigeseastin. Dan sivas ferte dadjat ahte dát lea sámi dihtor máilmmis issoras guhkes lávki ovddasguvlui.

■ Go dát dihtorprográmma lea gárvis

ja dohkkehuvvon almmolaš geavaheapmái, de ferte bidjat ollu návccaid juohkit dan almmolašvuhtii. Galgá bidjat ulbmilin ahte juohke dihtoris sámemáilmmis gávdno dát prográmma, mii maddái bohtá hálddašit iešguđet samesuopmaniid olles sámi máilmmes. Otná dilis diehtit mii ahte sáme giella guhkin eret gávdno juohke dihtoris, muhto dasa maddái ferte návccaid bidjat vai čálalaš sáme giella geavahuvvo.

■ Dáinna prográmmain sáhttet eanet ja eanet geavaheaddjit duostat geavahišgoahit čálalaš giela. Olles sámi oahpahussuorggit, nugo skuvllat ja eará almmolaš ása husat, fertejit dán vejolašvuoda dohppet. Giellapolitihkalaččat galgá dát dáhpáhus nannosit geavahuvvot. Jávkan leat ákkat ahte sáme giella ii doaimma dihtoris, danne mii čállit dušše dárogillii. Jávkan leat ákkat ahte čálalaš sáme giella lea nohkamin. Dál lea min iežamet duohken dohppet vejolašvuoda ja dahkat čálalaš giela ealligiellan.

■ Sámi čálalaš mediaide lea dát ođđa veahkkeneavvu dego niehku. Eat mii álggos duostan ollásit jáhkkitge ahte

*Jávkan leat ákkat ahte sáme giella ii doaimma dihtoris, danne mii čállit dušše dárogillii*

Min Áigi oaivvilda

dát šaddá duohtavuhtan. Sámi aviissaide bohtá dát váikkuhit ahte mii bohtit seastit divrras áiggi artiikkaliid válbmemis. Sihke journalisttat ja gielladárkkisteaddjit bohtet leat mealgat jođaneabbo barggusteaset. Loahppabođus šaddá ahte aviisa šaddá eanet áigeguovdil go lea vejolaš guhkebuš vuordit ovdal go loahppamearkka čállosii bijat. Danne leat dát deháleamos dáhpáhus sámi giella máilmmes guhkes áigái. Min sávaldat livččii vel ahte dán prográmma geažil bohtet maddái buot lohkkidčállosat sáme giellii.